



6. marts 2026

UPA2026/111

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Trafikstyrelsip aalajangersagaasa Kalaallit Nunaanni pissutsinut naammattumik naleqqussarneqarsimanersut nalilersorneqassasoq, ilanngullugu pingaartumik isorliunerusuni pissutsit eqqarsaatigalugit, tamatumalu tunngavigalugu pisariaqartunik naleqqusnaanissamut siunnersuutit saqqummiunneqassasut pillugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siumup inatsisartuni eqimattaa)

Tunngavilersuut:

Trafikstyrelsip aalajangersagai amerlanertigut Danmarkimi Europamilu pissutsit aallaavigalugit suliarineqarsimapput. Piviusumili malittarisassat taakku Kalaallit Nunaanni atorneqartillugit ajornartorsiutinik annertuunik pilersitsisinnaasarput, tassami nunap inissisimaffia, attaveqaasersuutit silallu pissusaa Danmarkimi pissutsinit annertuumik allaanerummata.

Pingaartumik isorliunerusuni najugaqarfiusunilu mikinerusuni malittarisassat taakku angallannermut ingerlatsinermullu tunngatillugu allaffissornikkut aammalu ingerlatsinikkut aporfinnik pisariaqanngitsunik pilersitsisinnaasarput. Tamanna ilaanni inuit, nioqqutissat pilersuinerimullu pingaarutilimmik angallassinert kinguarsarneqarnissaannik imaluunniit allaat akornusersorneqarnissaannik kinguneqarsinnaavoq.

Taamaattumik naleqquttutut isigineqarpoq ataatsimut nalilersuineq ingerlanneqassasoq, tassanilu nalilerneqassalluni malittarisassat atuuttut Kalaallit Nunaanni pissutsinut naleqquttuunersut. Nalilersuineq ilaatigut ersersissavaa malittarisassat qanoq annertutigisumik isorliunerusuni angallannermut ajornartorsiutinik pilersitsinersut kiisalu naleqqusnaanissamut imaluunniit immikkut ittunik malittarisassaqaarnissamut pisariaqartitsisoqarneris, najukkani pissutsinik pitsaanerusumik eqqarsaatiginnittunik.

Siunertarineqarpoq angallannermut tunngasuni malittarisassiat nunami tamarmi angallannermut periarfissanik pilersuinerimullu isumannaallisaanermik tapersersuinissaat, peqatigisaanillu isumannaallisaanermut tunngasut pisariaqartinneqartut ingerlaannarnissaat qulakkeerlugu.



Pisortanut aningaasatigut allaffissornikkullu kingunerisassai:

Nalilersuinerup ingerlanneqarnera Naalakkersuisut tungaanit annikitsumik allaffissornikkut aningaasartuuteqartitsissasoq naatsorsuutigineqarpoq, ilaatigut misissueqqissaarnermut kiisalu oqartussaasunik susassaqtunillu attuumassuteqartunik peqataatitsinermut atatillugu. Aningaasartuutit naatsorsuutigineqarpoq aningaasaliissutit pioreersut iluanni akilerneqarsinnaassasut.

Nalilersuinerup kingorna malittarisassianik allannguinnissamut siunnersuuteqartoqassappat, siunissami allaffissornikkut oqilisaassinermik kiisalu ingerlatsinermi pitsaannerusumik angusaqarnissamut periarfissanik pilersitsisinnaavoq, pingaartumik suliassanik suliarinninnermi aammalu allaffissornermi, angallannermut immikkut ajornartorsiuteqarfiusuni.

Namminersortunut aningaasaatigut allaffissornikkullu kingunerisassai:

Nalilersuinerup ingerlanneqarnera namminersorlutik inuussutissarsiortunut toqqaannartumik annertuunik kingunerisassartaqarnissaa naatsorsuutigineqanngilaq. Nalilersuinerup kingorna malittarisassianik naleqqussaanerit ingerlanneqassappata, tamanna siunissami ingerlatsinermut atatillugu allaffissornikkut oqilisaassinermik aammalu ingerlatsinermi pitsaannerusumik periarfissanik pilersitsisinnaavoq.

Innuttaasunut aningaasatigut allaffissornikkullu kingunerisassai:

Nalilersuineq nammineq ingerlanneqartillugu innuttaasut aningaasatigut imaluunniit allaffissornikkut toqqaannartumik kingunerisassaqaarnissaa naatsorsuutigineqanngilaq.

Siunissami malittarisassat Kalaallit Nunaanni pissutsinut pitsaannerusumik naleqqussarneqassappata, tamanna pingaartumik isorliunerusuni angallannissamut periarfissanik pitsaanerulersitsisinnaavoq aammalu innuttaasut najukkani inuussutissarsiortullu praktiskiusumik aporfinnik ikinnerusunik naapitaqarsinnaallutik.